

Waxaa halkan hoos qoran Xeerkii Nidaamka Ururada iyo Axsaabta Siyaasada ee hore loo hirgeliyey iyo Wax ka bedelkii ay Golaha Wakiiladu ku sameeyeen 22kii Oktoobar 2011. Bedelaada waxaan ku daray Xeerkii halka ku haboon in kastoo lambarada qodobada cusub ay haboontahay in Barlamaanku dib u hagaajiyo. Wax ka bedelada aan badneyn ee Xeer lagu daro ee ah qodob cusub oo aan aheyn ku biirad qodob jira waxa caadado tahay in la siiyo lambarka ka horeyey oo laguna darey xaraf si weyn u qoran (mithaal ahaan qodobka cusub ee ku xiga kan 3aad ee xeerkha hore ugu jirey, lambarkiiso waa 3B, haddii ay labo qobod yihiina kan kale waa 3T iwm (In English 3A, 3B, 3C etc). Berrigii hore ee laatiinka la istamali jirey waxa la isticamali jirey 3bis, 3tris, 3quarter iwm. Markaas Xeerkha intiisa kale looma baahna in la badalo lambarada qodobadiisi hore.

Wax ka bedelkani wusuu u gudbayaa Golaha Guurtida iyo Madaxeynaha inta aanu hirgelin, sidaas awgeed waxaan hadda geliyey bedelaadaha buqshado gaar ah, waxaanan xariiq mariyey kalmadaha amaba weedhaha la bedelayo. Lambrada sida caalimga ah waan ku darey in kastoo aanan bedellin lambarada cusub ee Wakiilado ansixiyeen.

Ibrahim Xaashi Jama, www.somalilandlaw.com 24/10/2011

JAMHUURIYADDA SOMALILAND
XEERKA NIDAAMKA URURADA IYO AXaabta SIYAASADA
YO WAX KA BEDELKII GOLAHA WAKIILADA (oo far leexsan ku qoran)
XEER No. 14/2011



GOLAHA WAKIILADA

Markuu arkay: Qodobka 9aad, 22aad, iyo 23aad ee Dastuurka Jamhuuriyadda Somaliland.

Markuu arkay: Xeer Madaxweyne ee Lr: **0165/072011** ee tixraaca **RSL/M/ERM/249-635/07211**, ee Furashada Ururada Siyaasadeed iyo Geedi Socodka Doorashooyinka iyo kaabista iyo wax kabalka **Xeer Lr.14/2000**.

Markuu Xaqiijiyay: In ay lagama maarmaan tahay in la abuuro Xeerali iyo Shuruuc kala hagta sida ay Muwaadiniintu u gudan karaan xuquuqdooda siyaasadeed si waafaqsan Dastuurka iyagoo uga qayb-qaadanaaya hawlaho siyaasadeed si nabagelyo ah si ay awoodda dalka u hantaa.

Markuu Tixgaliyay: In muwaadiniintu ay xaq u leeyihin in ay helaan xuquuqdooda siyaasadeed iyo gudashada waajibaadka saaran marka ay

abuurayaan Ururo siyaasadeed iyo in la habeeyo mabaadii'da iyo Shuruucda kala hagaysa Xisbiyada qaranka ee Shakhsiyadda Qaanuuniga ah leh.

Markuu Ku Qancay: Baahida loo qabo in dib-u-habayn iyo Wax-ka-beddel lagu sameeyo Xeerka Nidaamka Axsaabta/Ururrada Siyaasadda, Xeer Lr. 14/2000.

WUXUU
KAABIS IYO WAX-KA BADAL KU SAMEEYHEY:

Xeerka Nidaamka Ururrada iyo Axsaabta Siyaasadda Xeer LR 14/ 2000

Wuxuuna soo saaray Xeer Lr. 14/2011

QAYBTA 1AAD: QODOBBO GUUD

Qodobka 1aad: Eraybixin

- 1) **"Guddi":** Waxaa loola jeedaa Gudidda diwaangelinta ururada siyaasada iyo Ansixinta xusbiyada Qaranka.
- 2) **"Komishan":** Waxaa loola jeedaa Komishanka Doorashooyinka Qaranka (KDQ).
- 3) **"Gobol/Degmo":** Waxaa loola jeedaa Gobollada iyo Degmooyinka ku xusan Xeer Lr. 23/2002.
- 4) **"Urur Siyaasadeed":** Waxaa loola jeedaa koox muwaadiniin ah oo wadaaga fikir siyaasadeed oo isu-diiwaan-geliya Urur ahaan si ay uga qayb-qaataan doorashooyinka Goleyaasha Deegaanka ka hor inta aan loo aqoonsan xisbiyo Qaran.
- 5) **"Xisbi/Xisbiyo":** Waxaa loola jeedaa Xisbi/Xisbiyada Qaran ee la ansixiyay si ay uga qayb-qaataan doorashooyinka Guud ee Golaha Wakiillada iyo kuwa Madaxweynaha iyo Ku-xigeenkiisa;
- 6) **"Ajanabi":** Waxa loola jeedaa Shakhi kasta oo aan u dhalan Jamhuuriyadda Somaliland.
- 7) **"Warbaahinta Dawladda":** Waxaa loola jeedaa idaacadaha, Wargeesyada, Shineemooyinka, Telefishanka Qaranka iyo nooc kasta oo warbaahineed oo ay Dawladdu maamusho;
- 8) **"Hantida Dawladda":** Waxaa loola jeedaa Hantida Guurtada ah iyo Ma-guurtada ee ay Dawladdu leedahay nooc kasta ha ahaatee.
- 9) **"Arjiga Codsiga":** Waxaa loola jeedaa Foom gaar ah oo uu diyaariiyay Gudidda diwaan-gelinta Ururda siyaasada iyo ansixinta xisbiyada oo faahfaahinaaya shuruudaha laga rabo in uu buuxiyo Urur Siyaasadeed kasta oo is diwaan-gelinaya.
- 10) **"Doorashooyinka Qaranka":** Waxaa loola jeedaa doorashooyinka Guud ee ay ku tartamayaan Saddexda Xisbi Qaran.

- 11) "**Hoggaamiyeeyasha Xisbi/Urur Qaran**": Waxaa loola jeedaa hoggaanka sare ee Xisbi/Urur oo uu ka mid yahay Gudoomiyaha, Gudoomiye-kuxigeennada, Xog-hayaha Guud iyo ku xigeenkiisa.
- 12) **Golayaasha sharciga ah**: waxa loola jeedaa Golayaasha Dastuuriga ah ee JSL oo kala ah:-
 - b. Golaha Guurtida
 - t. Golaha Wakiilada
 - j. Golaha deegaanka

QAYBTA 2AAD

Qodobka 2aad: Mabaadii'da Guud iyo U Hoggaansanaanta Sharciga

- 1) Xisbiyada/Ururadu waa in ay u hoggaansanaadaan Dastuurka, Xeerarka dalka iyo hanaanka Dimoqraadiyadda, waana in aanu wax u dhimaynin midnimada dalka, dhammaanshaha dhul ahaaneed ee Jamhuuriyadda Somaliland iyo nabadgelyada guud;
- 2) Xisbiyada/Ururadu waa in ay ka qayb-qaataan in ay taageerayaashooda baraan tartanka doorashooyinka iyo Dimoqraadiyadda waana in ay tix-gelin dheeraad ah siiyan Haweenka iyo dhalinyarada.
- 3) Xisbiyada/Ururadu waa in aanay ku salaysnayn Qabiil, lab ama dheddig keliya, ama nooc kale oo kasta oo Bulshada kala faquuquaaya
- 4) Xisbiyada Qaranka iyo Ururada waxaa lagu maamulayaa si waafaqsan xeerkan isla markaana aan ka soo hor jeedsan shareecada islaamka, Dastuurka Qaranka, xeerarka dalka, iyo xeeraraka Xisbiyada ama Ururda:
- 5) Cid kasta oo reer Somaliland ah buuxisana shuruudaha xeerkan wuxuu xaq u yeelanayaa in uu samaysto Urur siyaasadeed si waafaqsan Xeerkan;
- 6) Marka ay dhacdo in laba urur iyo in ka badini isu tagaan si ay u samaystaan is-bahaysi ama Urur/xisbi ku biiro inta ka horaysa doorashada Golayaasha Degaanada, waxa loo soo gudbinayaa Gudidda Diiwaan-gelinta Ururada siyaasada iyo ansixinta Axsaabta Qaran ka nuqul asal ah (original) oo ah heshiiska isbahaysiga ah.

QAYBTA 3AAD: QAABDHISMEEDKA IYO XILKA GUDDIDA DIWAANGELINTA

Qodobka 3aad: Guddida Diiwaan-gelinta Ururada Siyaasiga ah iyo Ansixinta Axsaabta Qaranka.

1. Dalka JSL wuxuu yeelanayaa Guddi guud oo madax-banaan, una xilsaaran diiwaangelinta Ururrada Siyaasada iyo Ansixinta Axsaabta Qaranka.
2. Tirada Gudiddu waa 7 (todoba) xubnood oo ugu yaraan mid ka mid ahi sharci-yaqaan yahay.
3. Gudiddu waxay iska dhedooranaysaa Gudoomiyeye, Gudoomiye xigeen iyo Xoghaye.
4. Guddida waxa lagu soo xulanayaa shuruudaha hoos ku qoran:-
 - b. Inuu Muslin yahay/tahay kuna dhaqmo diinta Islaamka.
 - t. Inuu Muwaadin yahay/tahay da'diisuna ka yaraan 30 sanno.

- j. Inuu/inay jidh ahaan iyo caqli ahaanba u gudan karo xilkiisa.
 - x. Inuu/inay leeyahay aqoon wax barasho oo gaadhsiisan shahaadada koowaad ee jaamacadda (First degree).
 - kh. In aanu/inaanay hore ugu dhicin xukun ciqaabeed oo Kama dambays ah oo maxkamad horteed kaga cadaaday shantii sanno ee u dambaysay.
 - d. Inuu/inay yahay xilkas, dhaqankiisa iyo akhlaaqdiisuna toosan yihiin, yahayna shakhsi ku sifoobay dhex-dhexaadnimo.
 - r. Inuu/inay leeyahay waayo-aragnimo shaqo iyo maamul oo dhan 5 5 sanno ugu yaraan.
 - s. Inuu/inay ku sugnaa/sugnayd dalka JSL labadii sano ee ugu dambeeyay sixidhiidha ah.
 - sh. Halka sharci yaqaan waxa u dheer shuruudahaasi inay leeyahay/leedahay shuruudaha lagu soo doorto garsoorayaasha Maxkamada Sare.
5. Xarunta dhexe ee guddidu waxay ahaanysaa Hargeysa waxayna ku yeelanayaan wakiilo gobolada iyo degmooyinka dalka.
 6. Guddidu waxay xilka haynayaan muddo (2) labo sano ah oo ka bilaabanta maalinta ay Maxakamada sare xilka u dhaariso; **Madaxweynuhuna waa u cusboonaysiin karaa hadii loo baahdo, iyada oo muddo kordhintaasi cusub laga ansixin doono Gollaha Wakiilada. (Bedelaad).**
 7. Madaxweynaha JSL ayaa magacaabaya Gudidda diiwaangalinta ururada siyaasada iyo axsaabta qaranka.
 8. Golaha wakiilada ayaa kalabadh iyo hal (41+1) tirada guud ku ogolaanaya gudidda diwaan galinta urarada siyaasada iyo axsaabta qaranka.
 9. Guddidu waxay yeelanayaan gunno la mid ah Gunada Komishanka Qaranka la siiyo.
 10. Gudoomiyaha Maxkamadda Sare ayaa ku dhaarinaya Guddida dhaartan todobaad ka dib maalinta Golaha Wakiiladu ansixiyo (**WAXA IGU WALAAHIYA, BILAAHIYA, INAANAN KA MID AHAYN KUNA JIRIN UNUG, URUR IYO XISBIYO QARAN TOONA, KANA MID NOQONEYN URUR IYO XISBI KALE INTAAN XILKA HAYO. UGUNA ADEEGAYO BULSHADA SOMALILAND CADAALAD, SINAAN IYO DAACADNIMO**).

Qodob Cusub oo fiican in laamriisa laga dhigo Qodobka 3B (or 3A in English):

Qodobka 4aad: Xilka qaadista Guddida Diiwaangelinta Ururada Siyaasadda iyo Ansixinta Axsaabta Qaranka.

- b. **Xubnaha Guddida waxaa xilka lagaga qaadi karaa habka loo maro xilka qaadista Komishanka Doorashooyinka Qaranka;**
- t. **Hadii ay dhacdo mudadii xilka Gudida oo aan dhamaan ay isku mar xubnaha Guddidu baneeyaan jagooyinkoodii, Guddida cusub ee la magaacaabaa waxay dhamaystirayaan mudadii xilka ka hadhsanayd,**
- J. **Hadii Xubin ka mid ah Guddidu ay banayso xubinimada Guddida, Madaxweynaha ayaa badalkeeda soo buuxin doona, Xubinta cusub waxa ay dhamaysan doontaa muddo xileedka u hadhsan Guddida;**
- X. **Xubinta/naha cusub waxa ansixinayaa Golaha Wakiilada inta aan xilka loo dhaarin.**

QAYBTA 4AAD: DIIWAANGELINTA IYO HABRAACA

Qodobka 4aad: Codsashada Diiwaan-gelinta iyo Qabashada Araajida

(*Qodobkan wax ka bedelko waxa uu ka dhigay lambarkiisa Qod. 5aad, waxaase fiican in loo daayo lambarkiisa haddii kale kuwa kaloo dhan waa in la bedelaa lambaradooda*)

1. Guddidu waxay ku baahinaysaa warbaahinta dalka mudada qabashada codsiyada diiwaangelinta Ururada siyaasadeed, iyo mudada dhamaadka qabashada codsiyada diiwaangelinta. Mudada qabashada codsiyada diiwaangelintu waa ~~laba biloed gudahood (lixdan maalmod)~~ oo ka ~~bilaabmaysa maalinta la bilaabo baahinta qabashada codsiyada shan iyo afartan maalmod gudahood (45 days) oo bilaabmaysa maalinta la sii daayo baahinat qabashada codsiyada.~~ (*Bedelaad*)
2. Urudada siyaasiga ah ee cusub waxay is ka diwaan galinayaan xarunta guud ee Gudida diwaan galinta ururada siyaasad iyo axsaabta qaranka ee Hargaysa.
3. Urur kasta oo doonaya in loo diiwaangeliyo Urur siyaasadeed waa inuu ku soo qortaa arji foomka loogu talagalay, kuna soo hagaajiyya Guiddida, kuna lifaaqnaadaan caddaymaha iyo qoraalada soo socda:-
 - b) Goortii iyo goobtii ururku ku qabtey shirkii aasaaska ee ugu horeeyay.
 - t) Liiska magacyada aasaasayaasha ururka iyo habkii loo doortey.
 - j) Liiska magacyada hoganka, gudidda fulinta iyo golaha dhexe oo gudoomiyaha ama ku-xigeenku soo sexeexay.
 - x) Qaab-dhismeedka ururka oo ay ku caddahay magaca ururka oo dhan iyo habka uu u qormayo marka la soo gaabiyo iyo astaanta ururka.
 - d) Caddeyn bixin cashuurta diwaan gaklinta oo dhan **150, 000,000** (Boqol iyo konton milyan) shilin Somaliland. *Waxaa waajib ah in lacagta cashuurtu cadahay in la wadaagey oo aysan ka bixin gacan qudha, waxaana dabagal ku samaynaya Guiddida Diiwaan-gelinta.* (*Kordhin*)
 - r) Xisbiyada qaran ee haysata shahaadada xisbi nimo laga ma qaadayo cashuurta diwaan galinta.
 - s) mudada liisanka ee xisbi qaran waa tobant (10) sano oo ka bilaabma taariikhda liisanka la siiyay.

Qodobka 5aad: Xisbiyadda Qaran iyo Urarada ku meel gaadh ka ah

(*Qodobkan wax ka bedelko waxa uu ka dhigay lambarkiisa Qod. 6aad, waxaase fiican in loo daayo lambarkiisa haddii kale kuwa kaloo dhan waa in la bedelaa lambaradooda*)

1. Markay dhamaato mudada qabashada araajida diiwaangelinta Ururrada, Gudiddu diwaangalintauada siyaasiga ah iyo ansixinta axsaabta Qaranka waxay hubinaysaa ururada buuxiyey shuruudihii looga baahnaa, waxayna siinayaan ogolaansho ku meelgaadh ah oo uu ururkaasi ku hawlgalo.
2. ~~Mudada hawl galada ururada siyaasadeed waa 6 biloed oo ka bilaabanta taariikhda ogolaanshaha ku meel gaadhka ah la siiyey.~~ *Muddada hawl galada ururada siyaasadeed waa lix bilood gudahood waqtigana waxaa cayimaya Guiddida*

Diwaangelinta Ururada Siyaasada iyo Anxisinta Axsaabta Qaranka iyaga oo la tashanaya Guddida Doorashooyinka Qaranka. (Bedelaad)

- 3.S. Mudadda liisanka ee xisbi qaran waa toban (10) sano oo ka bilaabanta taariikhda liisanka la siiyay. (Bedelaad - Faqradan cusub waxa lambarkeedu ku fiican yahay 2B haddii Qodobkan loo deenyo in ay ku jirto halkan.)**
3. Xisbi/Urur kasta waa inuu ku keenaa mudada ku xusan Faqrada 2aad ee Qodobkan qoraalada iyo caddeymaha soo socda:-
 - b. Qabashadii shirweynaha ee Ururka ama xisbiga, meeshii uu ku qabtey, taariikhduu qabsoomay iyo wixii ugu weynaa ee ay qabteen, Sida liiska magacyada xubnaha golaha dhexe, Golaha Fulinta iyo magacyada hogaanka xisbiga.
 - t. Caddeyn in Ururkaasi ku leeyahay laamo hawlgal ah, ugana diiwaan-gashan yihiin ugu yaraan 1000 (Kun qof) xubnood gobol kasta, kuwaas oo haysta warqda aqoonsiga muwaadinimo oo sharci ah.
 4. Ururka la siiyo ogolaansho ku meel gaadh ah oo uu ku hawl-galo, waa in Guddidu siisaa afar (4) nuql oo xeerkan ah
 5. Xisbi/urur kasta oo siyaasadeed waa in xeekiisa ku caddahay ku dhaqanka dimoqraadiyadda, tallo-wadaaga iyo maamul wanaag.
 6. Urur kasta waa inuu gudidda u keeno 3 nuql oo daabacan oo ah xeekiisa iyo cinwaanadiisa gobolada iyo degmooyinka dalka.
 7. Xisbi/urur kasta waa in xeerarkisu waafaqsan yahay Dastuurka iyo Xeerarka dalka JSL.
 8. Xisbi/Urur kasta waa inuu xubin ka noqon karo qof kasta oo Somalilander ahi
 9. Ururka siyaasadeed ee loo ansixyo xisbi, kuma biiri karo Xisbi kale doorashooyinka ka hor iyo kadib, sidoo kale waa iney xeekiisa ku caddaataa inaan laga saari karin/eryi karin xisbiga xubin ama xubno loo doortey Golayaasha sharciga ah haadii aanay ka hor imanayn xeerar ka dalka iyo xeerka xisbiga **ama aanay xubintu/xubnuhu iskood uga tanaasulin xubinamada xisbiga. (Bedelaad)**
 10. Xisbi kasta oo siyaasadeed waa inay barnaamijiisa ku caddaato qorshayaashan:-
 - b. Sugidda nabadjelyada, deganaanshaha iyo xasiloonidda dalka.
 - t. Horumarinta waxbarashada iyo Diinta
 - j. Horumarinta caafimaadka iyo fayo-dhawrka.
 - x. Daryeelka iyo ilaalinta degaanka.
 - kh. Dhaqaaleyna iyo soo saaridda kheyraadka dabiiciga ah ee dalka
 - d. Horumarinta cilmiga iyo teknoolajiyada.
 - r. Dhiiri gelinta dhalinyarada iyo haweenka ee ka qayb qaadashada siyaasada dalka.
 - s. Ilaalinta Dastuurka iyo xeerarka dalka.

Qodobka 6aad: Kala reebida Xisbiyada/Ururda ku tartama doorashada Deegaanka

1. Saddexda xisbi/Urur ee doorashada Dawladaha Hoose ka hela 20% codadka gobol kasta ayaa loo aqoonsanayaa Xisbi qaran, lana siinaya shahaadada aqoonsiga xisbi.
2. Haddii hal xisbi oo keliya ku guulaysto doorashada oo uu ka helo 20% codadka gobol kasta, Guddidu waxay u aqoonsanaysaa xisbiyo Qaran isaga iyo labada Xisbi ee ku xiga isu gaynta codadka boqolayda gobol kasta.

3. Hadii ay is leekaato tirada Boqoleyda Gobolada ee laba Urur ama ka badan waxaa lagu kala saarayaa. Sida ay ugu kala Bataan tiradada guud ee codad ka.
4. Haddii ururada siyaasadeed midna gaadhi waayo 20% waxay Guddidu u aqoonsanayaan Xisbiyo Qaran saddexda Xisbi ee ugu tirada badan codadka doorashoonyinka boqolayda gobolada dalka.
5. Tobankii (10) sannadoodba mar baa la abuuri karaa Urur Siyaasadeed si waafaqsan Xeerkana. Hase-ahaatee waa in Urur Siyaasadeed la abuuraa ugu yaraan 6(lix) bilood ka hor maalinta la qabanaayo doorashada Goleyaasha Deegaanka.

Qodobka 7aad: Waxyabaha ka reebban Xisbiyada/Ururada

1. Waxaa ka reebban xisbi/urur kasta inuu u soo gudbiyo Guddida war bixin been ah ama khaldan.
2. Xisbina kama muuqan karto xeerarkiisa qodob ama qodobo ka hor imanaya Dastuurka iyo Shareecada Islaamka.
3. Xisbi/Urur kasta waxaa ka reebban inuu dhaqaale ka helo illo shisheeye.
4. Xisbi/urur kasta waxaa ka reebban inuu hantida qaranka Somaliland u adeegsado ama u isticmaalo hawlihiisa u gaarka ah ee doorashoonyinka.
5. Xisbi/urur kasta waxaa ka reebban inuu adeegsado koox ama ciidan hubaysan oo uu ku fushado danihiisa gaarka ah.

Qodobka 8aad: Xuquuqda Xisbiyadda Qaranka

- 1) Xisbiyada Qaranka ee la siiyey shahaadada xisbinimo siyaasadeed, waxay xaq u leeyihii:
 - b. Inay si siman u adeegsadaan warbaahinta qaranka, waxayna yeelan karaan Warbaahin u gaar ah markey ogolaansho ka helaan hay'adaha ku shaqada leh.
 - t. Inay si xor ah u gudbiyaan afkaartooda siyaasadeed iyagoon wax u dhimayn xasiloonida iyo nabadjelyada guud ee dalka.
 - j. inaan la cabudhinkarin mas-uuliyiinta xisbiyada ciidamada amaankuna aanay gali karin xarumohooda ilaa ogolaasho laga helo Maxkamadda awooda u leh,
 - x. xisbiyada Qaranka ee mucaaridka ahi way dhaliili karaan xukuumada
 - kh. Xisbiyadu wixii dacwad ama cabashooyin ay ka tawdaan shaqada Guddida diwaan galinta ururada siyaasada iyo ansixinta axsaabta Qaranka waxay qoraal ahaan ugu gudbinayaan maxkamadda gobolka ay cabashadu ka jirto.
 - d. Haddii ay ku qanci waayaan go'aanka maxkamadda gobolku ka soo saarto, waxay racfaan uga qaadanayaan Maxkamadda Dastuuriga ah
 - r. Xibiyada qaranku way yeelan karaan hanti gaar ah.

Qodobka 9aad: Xuquuqda Muwaadiniinta

Muwaaddin kasta oo qaangaadh ah, wuxuu xaq u leeyahay:-

1. Inuu/inay ka qayb-qaato hawlaha siyaasadda.
2. Inuu/inay ku biiri karo xisbi ama urur siyaasadeed kuu/kay doorto.

3. Xubnaha ururku ama xisbigu waxay leeyihiin xuquuqo isku mid ah xaqaa doorashada iyo codayntaba marka lagu guda jiro xilliga doorashada xisbiga/ururka gudhiisa.
4. Xubin kasta oo doonaysa in ay ka baxdo xil xisbi ama urur.
 - b) Waa in xubinta xisbiga/ururku u soo gudbisaa arjiga is casilaada.
 - t) Waa in xisbiga /ururku ku aqbalaa ama ku diidaa 14 maal mood gudahood is casilaada xubinta.
5. Xubinina kama wada tirsanaan karto laba Xisbi/Urur ama Xisbi iyo Urur isla wakhti keliya.

Qodobka 10aad: Sababaha Lagu Waayi Karo Xubinnimada

Xubin ka tirsan Xisbi ama Urur waxaa laga saari karaa oo keliya marka:

- b) Ay samaysato urur kale
- t) Ay Ka qayb-qaadato urur kale oo la samaynayo
- j) Ay Ku biirto urur kale ama si caam ah ugu ololaya samaysiga urur kale
- x) Ay ku gafto xeerka u yaalla xisbiga/ururka

Qodobka 11aad: Musharixiinta u Tartamaysa Doorashooyinka Golaha Wakiilada iyo deegaanka

- 1) Qof kasta oo muwaadin Somaliland ahi wuxuu xaq u leeyahay in la doorto, waxna dooran karo, hase yeeshi waxaa musharax noqon kara:-
 - b. Muwaadin Somaliland ah, xisbina soo sharaxay, buuxiyeyna shuruudaha Xeerku jideeyey.
 - t. Ma banana in musharax madax-banaan oo aan magac xisbi wadanin isa soo sharaxo.
- 3) Gudidda fulinta ee xisbiyada ayaa soo magacaabaya musharixiinta uga qayb galaya doorashada Golaha Wakiiladda.
- 2) Gudidda Xisbiga ee Gobol kasta ayaa soo magacaabaya musharaxiinta heerka degmooyinka.

Qodobka 12aad: Mudada xilka Madexweynaha iyo Gudoomiyaha Xisbiga

1. Qofna jagada madexweynaha ma qaban karo laba jeer wax ka badan.
2. Xisbi qaran jagada gudoomiyaha xisbiga uma sharxi karo xubin laba xildoorasho wax ka badan.

QAYTA 5AAD: XEER-HOOSAADKA, QAAB-DHIMEEDKA IYO SHAQADA URURRADA SIYAASADDA

Qodobka 13aad: Xeer-hoosaadka iyo Qaab-dhismeedka Ururrada Siyaasadda

Xeer-hoosaadka Ururrada Siyaasadda waa in ay ku cad yihiin waxyaalahani:-

1. Magaca Ururka oo dhamaystiran.
2. Ujeeddooyinka Ururka.
3. Qaab-dhismeedka Ururka iyo Waaxyaha uu ka kooban yahay.

4. Xarunta dhexe ee Ururka oo ah Somaliland gudaheeda.
5. Qaabka lagu soo doorto ama lagu beddeli karo, muddada xilka ee mas'uuliyiinta. Ururka.
6. Shuruudaha Xubinta lagu noqon karo iyo sababta lagu waayi karo, iyo iscasilaadda xubinta ama mas'uulka
7. Qodobbo khuseeya sida Xeer-hoosaadka Ururka wax looga beddeli karo.

Qodobka 14aad: Reebbanaan

Uma banaana qof kasta oo ka tirsan Ciidammada Qalabka sida: Ciidanka qaran, Booliska, Ciidanka Asluubta, hay'adaha sirdoonka qaranka, Ururada aan Dawliga ahayn, shaqaalaha dowlada (civil servant) iyo xubnaha ka tirsan Garsoorka, Xeer-ilaalinta, iyo gudidda diwaan galinta ururada siyaasada iyo ansixinta xisbiyada qaranka in ay:

1. Samaystaan Urur Siyaasadeed iyo xubin ka-noqoshadiisaba.
2. In loo magacaabo xafiis Urur Siyaasadeed.
3. Ku lug-yeelato arrimo Axsaab/Urur oo luminaaya dhex-dhexaadnimada xafiiska uu joogo.
4. Taageerid ama ka-soo-hor-jeedsi Xisbi/Urur Siyaadadeed.

Qodobka 15aad: Astaamaha iyo Magacyada

Ururna ma isticmaali karo astaan ama magac uu hore u isticmaalay Urur kale, xisbi, Hay'adaha Dawladda ama Qaranka Somaliland.

Qodobka 16aad: Hoggaamiyeyaasha Xisbi/Urur Siyaasadeed

Qofka isu sharraxaaya hogaaanka Xisbi/Urur Siyaasadeed waa in uu buuxiyo shuruudahan:

1. Waa inuu/inay yahay muwaaddin reer Somaliland ah.
2. Waa in/inay ay da'diisu tahay ugu yaraan 30 jir.
3. Waa in/inay aanu ku dhicin xukun maxkamadeed oo ah fal-dambiyeed uu gaystay oo ka badan 3 (saddex) sanno 5tii sanno ee u dambaysay marka laga reebo in Madexweynaha JSL uu siiyay cafis.
4. Waa in/inay uu yahay qof muslin ah kuna dhaqma diinta islaamka.

Qodobka 17aad: Isbeddelka Hoggaanka iyo shuruucda Xisbiga/Ururka

1. Isbeddel kasta oo lagu sameeyo hoggaanka, shuruucda iyo Qaab-dhismeedka Xisbiga/Ururka waa in laga sheego warbaahinta ugu badnaan 15 maalmood ka dib marka uu Xisbigu/Ururku qabsado shirka uu ku gaadhay go'aanka isbeddelkaas.
2. Isla markaana waa in qoraal rasmi ah oo arrintaa ku saabsan loo diro xeer-ilaalinta iyo komishanka doorashooyinka qaranka mudo aan ka badnayn 15 maalmood.

QAYBTA 6AAD: WARBAAHINTA IYO HANTIDA XISBI/URUR SIYAASADEED

QODOBKA 18AAD: WARBAAHINTA XISBIGA AMA URURKA

1. Xisbi/Urur Siyaasadeed waxa uu xaq u leeyahay in uu abuuro Warbaahin uu gaar ah si waafaqsan shuruucda iyo xeerarka dalka ee khuseeya warbaahinta gaarka ah.
2. Xisbi/Urur Siyaasadeed waxa ka mamnuuc ah in ay faafiyaan, daabacaan ama baahiyaan warar been ah, isla markaana abuuraaya kicin iyo iska-hor imaad dadweyne, wiqaaya midnimada dalka, ama waxyeello u gaysanaaya nabadgelyada guud.
3. Xisbiyada/Ururada Siyaasaddu waxay si siman u isticmaalayaan warbaahinta ay Dawladdu maamusho wakhtiga ololaha doorashooyinka Qaranka.

Qodobka 19aad: Hantida Xisbi/Urur

Hantida Xisbi/Urur waxa ay ka iman kartaa:

1. Qaadhaanka ay xubnaha Xisbi/Urur bixiyaan.
2. Deeqda la siiyay Xisbiga/Ururka waa in ay ka timaado shirkado wadani ah, ama muwaadiniin reer Somaliland ah.
3. Kaalmo ay si siman u bixisay xukuumadu.

QAYBTA 7AAD: XISBIYADA SIYAASADDA EE JIRA

Qodobka 20aad: Shakhsiyadda Qaanuuniga ah ee Xisbiyada

1. Saddexda xisbiyo Qaran ee loo aqoonsado xisbiyo qaran waxa ay leeyihii Shakhsiyad Qaanuuni ah (Legal Personality).
2. Xisbiyada Siyaasaddu waxa ay xaq u leeyihii in ay u tartamaan Doorashooyinka Deegaanka ee soo socda. Haseyeeshee waa in ay Gudida diwaan-gelinta u soo gudbiyaan waxyaalah:
 - a. Magaca Xisbiga oo dhamaystiran
 - t. Ujeeddooyinka Xisbiga;
 - j. Qaab-dhismeedka Xisbiga iyo Waaxyaha uu ka kooban yahay
 - x. Xarunta dhexe ee Xisbiga oo ah Somaliland gudaheeda
 - kh. Qaabka lagu soo doorto ama lagu beddeli karo, muddada xilka ee mas'uuliyiinta Xisbiga,
 - d. Shuruudaha Xubinta lagu noqon karo iyo sababta lagu waayi karo, iyo iscasilaadda xubinta ama mas'uulka.
 - r. Qodobbo khuseeya sida Xeer-hoosaadka Xisbiga wax looga beddeli karo.

Qodobka 21aad: Ganaaxa ku xad-gudubka xeerka

Gudiddu waxa ay ganaax lacageed oo dhan Sodon milyan oo shillinka Somaliland ah (**30,000,000 SL/Sh**) ku soo rogayaa Xisbiga/Ururka ku xad-gudba Xeerkana.

QAYBTA 8AAD

Qodobka 22aad: Waxyabaha ka reeban adeegsiga deeqaha dawladda siiso Xisbiyada

Deeqaha dawladda looma isticmaali karo si toos ah ama si dadban in loogu qorsheeyo samaynta ganacsi gaar loo leeyahay, ha ahaato hanti guurto ah ama tu ma-guurto ahba.

Qodobka 23aad: Xisaabxidh

1. Xisbi Qaran kastaa waxaa uu samaynaya xisaab xidh sanadedd (dakhli iyo kharash) uu soo cadeeyay hanti dhawre madex banaan, waxaana loo gudbinayaa komishanka doorashooyinka Qaranka ugu danbayn 31 March ee sanad kasta.
2. ***Hanti dhawraha madaxa banaan waxaa codsanaya hawlgaalkiisa komishanka Doorashooyinka Qaranka ama Guiddida Diiwaangleinta Ururada. (Bedelaad)***

QAYBTA 9AAD: QODOBBO KALA DUWAN

Qodobka 24aad: Xisbiga Dhaca ama Ururka U Gudbi Waaya Xisbi

1. Xisbi kasta/Urur oo ku guulaysan waaya doorashada Golayaasha deegaanka waxay ku biirayaan iyaga iyo Xubnahooda golayaasha deegaanka ee ay ka helaan degmooyinka dalka saddexda xisbi qaran ee soo baxay kay doonaan, waxayna qoraal ahaan ugu gubinayaan Gudidda Diiwaangalinta mudo aan ka badnayn hal bil (30 maalmood).
2. Hadii xisbigii mudanaha Golaha wakiiladu uu ka tirsanaa ku dhaco tartarka Ururada iyo Xisbiyada waxaa mudanuhu ku biiri karaa xisbiga uu doorto, wuxuuna dhamaysanayaan mudo xileed ka u hadhsan.
3. Madaxweynaha iyo ku xigeenkisu waxay dhamaysanayaan mudada xilkooda inta uga hadhsan hadii xisbigoodu soo bixi waayo waxaana u furan inay galaan xisbigay doonaan.

Qodobka 25aad: Tayaynta iyo habaynta xisbiyada Qaranka

1. Xisbiyada Qaranka ee Doorashada ku guulaystaa waa in ay ku dhaqmaan maa-mul wanaag iyo dimuquraaduayad dhexdooda ah, waana in awooda loo siman yahay. Talada xisbigana waa in mar kasta lagu go'aan qaataa qaabka uu dhigaayo xeer hoosaadka.
2. Shirweynaha Xisbi Qaran waxaa la qabanayaa 5 (shantii sano) hal mar waxaana la baahinaya lixdan (60) maalmood ka hor.
3. Shirka xisbi ee golaha dhexe waxaa la qabanayaa halkii sanaba mar waxana la baahinaya 30 casho ka hor.

Faqradan cusub waxa fiican in lambarkeeda laga dhigo Qodobka 25(3B) (25(3A in English), waxaanu kuba fiican in lagu daro Qodobka 5(9).

Qodobka 25aad farqadiisa 3aad:

Mar kasta oo la furayo tartanka ururada siyaasadda ee G/Degaanka muddanaha Golaha Wakiilada ama Golayaasha Degaanka waxaa u banaan inuu furan karo urur siyaasadeed oo cusub ama uu ku biiri karo urur/xisbi siyaasadeed ee uu doono.

4. Shir waynaha xisbiga waxa lagu soo dooranaya.
 - b. Xubnaha hogaanka xisbiga iyo guddida fulinta
 - t. Xubnaha Golaha dhexe ee xisbiga
 - j. Waxaa lagu ansixinaya barnaamijka iyo xeer-hoosaadka xisbiga.
 5. Liiska xubnaha golaha fulinta iyo golaha dhexe ee xisbi iyo nuqul xeer-hoosaadkooda ah waxaa loo gudbinayaa xeer-ilaalinta, komishanka doorashooyinka qaranka iyo gudida diwaan gelinta mudo aan ka badnayn 30 maalmood shirwaynaha ka kib.
 6. Hogaanka xisbiga, Guddida fulinta iyo xubin golaha dhexe waxaa xilka qaadistooda soo jeedin kara.
 - b) 1/3 xubnaha golaha dhexe ee xisbiga.
 - t) Gudoomiyaha xisbiga.
 - j) Is-casilaad.
- Waxaana cod kala-badh iyo hal ku ansixinaya xubnaha golaha dhexe ee xisbiga.
7. Gudidda diwaangelinta Ururada Siyaasada iyo Ansixinta Xisbiyada Qaranka ayaa xisbiyada dhexdooda ku ilaalinaya Dimuqraadiyada, iyagoo war bixintooda u soo gudbinaya Golaha Wakiiladda marka loo baahdo.
 8. Marka mudo xileedka Gudidda diwaangelinta Ururada Siyaasada iyo Ansixinta Xisbiyada Qaranka uu dhamaado waxaa shaqadooda la wareegaya komishanka doorashooyinka qaranka.

Qodobka 26aad: Soo Saaridda Xeer-Nidaamiye (Power to Issue Regulations)

Gudida Diwaangelinta Ururadda Siyaasadda iyo Ansixinta Xisbayada Qaranku waxa uu awood u leeyahay in uu soo saaro Xeer-nidaamiye (Regulations), Xeerka Hab-dhaqanka (Code of Conduct) iyo Awaamiir (Directives) aan ka hor imanayn xeerka.

Qodobkan cusub waxaa fiican in lambarkiisa laga dhigo Qodobka 26B (26A, in English)

Qodobka 26aad: Khilaafaadka ka Dhasha Xisbi/Urur Dhexdii ama Laba Urur/Xisbi

1. *Haddii xubnaha xisbi ama urur isku khilaafaan hogaanka ama u kala jabaan laba meeloood iyo wax ka badan, hay'adaha xisbigu/ururkuna xalin kari waayaan khilaafka, waxa dhinicci danaynayaa dacwad u gubinayaa Gudidda Diwaan-gelinta Ururada iyo Ansixinta Axsaabta Qaranka.*
2. *Gudiga diiwaan gelintu markuu helo dacwadda ku xusan farqadda 1aad ee Qodobkan, wuxuu ka soo saarayaa go'aan ku salaysan Xeerka Nidaamka Ururada iyo Axsaabta Siyaasadeed ee Xeer lam. 14/2011 iyo dastuurka xisbiga/ururka hogaankiisa laysku haysto ee laga diiwaan geliyey Guddida Diiwaan-gelinta.*
3. *Dhinicci ku qanci waaya go'aanka gudidda diiwaan gelinta waxaa u bannaan in uu racfaan u qaato Maxkamadda Sare, xukunkeeduna wuxuu noqonayaa kama dambays.*
4. *Haddii dhinacyada is hayaa la yimaadaan laba dastuur oo is khilaafsan oo loo sameeyey ururka/ xisbiga hogaankiisa laysku haysto , waxaa la tixgelinayaa dastuurka laga diiwaan geliyey guddida diiwaan gelinta ee lagu aqoonsaday ururka/xisbiga.*

5. *Haddii khilaafka farqadaha hore ku qorani yimaado inta aan ururka la diiwaan gelin ee aan aqoonsiga la siin, gudidda diiwaan-gelintu ma diiwaan gelinayso magaca ururka hogaankiisa laysku khilaafay.*
6. *Dhinacyadana waxaa u banaan in mid waliba gaarkiisa u samaysto urur kale oo aan la hayn magacii laysku qabsaday.*
7. *Haddii laba urur ama urur iyo xisbi isku qabsadaan magaca ama astaanta diiwaan-gelinta ka dib, waxaa loo aqoonsanayaa in uu leeyahay magacaas ama astaantaas kan Gudiddu u diiwaan gelisey ama loo hor diiwaan geliyey.*

Qodobka 27aad: Laalis

1. Xeerka Nidaamka Ururrada iyo Axsaabta Siyaasadda (Xeer Lr. 14/2000) waxaa badalay **Xeer Lr..14/2011**
2. Xeer kasta oo ka soo horjeeda Xeerkani waa waxba kama jiraan (null and void).

Qodobka 28aad: Dhaqan-galka

Xeerkani waxa uu dhaqan-gelayaa marka ay Goleyaasha Xeer-dejintu ansixiyaan Madaxweynuhuna saxeexo.

**C/risaaq Siciid Ayaanle
Xog .Guud ee Golaha Wakiilada**

**C/raxmaan Maxamed C/laahi (Cirro
Gudoomiyaha Golaha Wakiilada JSL**

XEER MADAXWEYNE NO. 0168/082011

REF: JSL/M/XERM/219-683/082011

DATE: 20/08/11

DHAQAN-GALKA XEER LR. 14/2011

MADAXWEYNAHA JAMHUURIYADDA SOMALILAND

Markuu Arkay: Qodobka 90aad ee Dastuurka Jamhuuriyadda Somaliland,

Markuu Helay: Go'aanka Golaha Wakiilada JSL ee Go'aan Lr. GW/KF-15/534/2011, ee Ansixinta Xeerka Nidaamka Ururada iyo Axsaabta Siyaasadda,

Markuu Arkay: Qodobka 75aad ee Dastuurka Jamhuuriyadda Somaliland.

Wuxuu Soo Saaray,

Dhaqan-galka Xeerka Nidaamka Ururada iyo Axsaabta Siyaasadda ee Jamhuuriyadda Somaliland ee Xeer Lr. 14/2011.

Alla Mahad Leh

Ahmed Maxamed Silanyo
Madaxweynaha Jamhuuriyadda Somaliland